



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA

Komunikasu Imprensa

Munisípiu Bobonaro

24 Outubru 2023

JSMP hahú halo kampaña dahuluk ba prevensaun Tráfiku Umanu no Violénsia Bazeia ba Jéneru (VBJ) iha área fronteira Batugade

Iha 20 Outubru 2023, JSMP organiza kampaña dahuluk ba prevensaun tráfiku umanu no violénsia bazeia jéneru (VBJ) iha Sede Suku Batugade, Postu Administrativu Balibo, Munisípiu Bobonaro.

Atividade kampaña ida ne'e nu'udar parte ida husi programa tinan rua (2) ho títulu "Prevensaun no Resposta ba Tráfiku Umanu ho Baze iha Komunidade, Responsivu ba Jéneru no Sentradu ba Sobrevivente (2023-2024)" ne'ebé finansia husi Governu Timor-Leste liuhusi Ministériu Interiór no implementa husi UN Women Timor-Leste ho parseria ho JSMP. Ho programa ida ne'e, JSMP iha planu atu halo kampaña alende iha Batugade, munisípiu Bobonaro nian, kampaña ne'e sei hala'o iha munisípiu Dili no posível ba tan munisípiu Kobalima no mós RAEOA.

Atividade kampaña ne'e halo liuhosi hatudu teatru ne'ebé naradór no autór sira mai hosi mobilizadór sira komunidade Suku Batugade ne'ebé antes ne'e JSMP estabelese no fasilita formasaun ho matéria sira relevante ba tráfiku umanu no VBJ. Teatru ne'e konta istória kona-ba oinsa timoroan ida sai vítima tráfiku umanu iha nasaun viziñu Indonézia. Autór prinsipál sira iha teatru ne'e mak vítima, trafikante sira, vítima nia inan no belun di'ak, xefe suku, PNTL no polísia imigrasaun, traballadór sosiál no representante sosiedade sivil no juis.

Objetivu hosi atividade kampaña tráfiku umanu mak atu alerta no fó hanoin ba públiku iha jerál no komunidade sira iha área fronteira, liuliu suku Batugade kona-ba saida mak tráfiku umanu no VBJ no mós oinsa atu bele identifika no prevene.

"JSMP apresia aas tebes Governu Timor-Leste ne'ebé tau prioriedade aas tebes ba asuntu tráfiku umanu no mós fó konfiansa no apoiu finanseiru ba parseiru nasional no internasionál sira hodi habelar informasaun no hasa'e koñesimentu públiku nian liuhosi formasaun no kampaña atu bele prevene no kombate ho efetivu no efikásia ba iha tráfiku umanu, tanba situasaun sosio-ekonómiku no jeografia Timor-Leste nian halo timoroan barak sei sai vulnerável ba tráfiku umanu," dehan Diretora Ezekutiva JSMP, Sra. Ana Paula Marçal.

Atividade kampaña prevensaun tráfiku umanu no violénsia bazeia jéneru ne'e oficialmente loke hosi Sr. Januario Moises, Xefe Suku Batugade, no akompañia hosi Diretora Ezekutiva JSMP, Sra. Ana Paula Marçal, Representante UN Women, Sra. Alenxandra Axelsson, Komandante Polísia Imigrasaun Batugade, Representante hosi Polísia Eskuadra Batugade, Representante hosi Alfândega no Representante hosi Unidade Polísia Fronteira (UPF).

Diretora JSMP iha nia diskursu iha abertura hateten katak ho atividade kampaña ne'e, bele hasa'e tan abilidade no koñesimentu comunidade, juventude no estrutura sira-nian kona-ba Tráfiku Umanu no VBJ iha Suku Batugade, nune'e sira bele kontribui ho efetivamente ba esforsu Governu Timor-Leste nian ba prevene no kombat Tráfiku Umanu no VBJ, nune'e mós JSMP hanoin katak kampaña ne'e hanesan meu ida ba prevene krime tráfiku umanu no VBJ iha Timor Leste.

Xefe Suku Batugade iha nia diskursu, agradese ba JSMP tanba bele organiza atividade importante sira ne'e iha nia suku hahú hosi treinamentu to'o mai kampaña. Nia konsidera atividade treinamentu ba estrutura suku no comunidade iha jéral, bele ajuda membru comunidade sira hatene ona kona-ba tráfiku umanu no iha ona kuñesimentu natoon kona-ba oinsa bele identifika no halo prevensaun ba krime tráfiku umanu. Xefe suku mós hateten katak atividade treinamentu kona-ba tráfiku umanu ne'e importante tebes, tanba ne'e hanesan autoridade lokál nafatin husu ba Governu no ajénsia sira hodi bele kontinua apoiu atividade ne'e iha área sira ne'ebé iha poténsia ba akontese krime tráfiku umanu.

Iha parte seluk, representante UN-Women, Sr. Jeremias Batista Gomes informa ba konvidadu sira programa ne'e UN-Women hetan apoiu orsamentu hosi Governu Timor-Leste liuhosi Ministériu Interiór no parseria ho JSMP iha implementasaun atividade sira hodi halo prevensaun ba krime tráfiku umanu, tanba iha realidade krime tráfiku umanu kontinua akontese tantu iha Timor-Leste no mós iha mundu. Iha atividade prevensaun ba krime tráfiku umanu ne'ebé serbisu hamutuk ho JSMP ne'e foka liu iha munisípiu sira, liuliu iha área fronteira sira hanesan Bobonaro, Kobalima, Oekusi no Dili. Atividade ne'e halo ho objetivu mak atu ajuda comunidade sira bele identifika tipu ka sinál hosi krime tráfiku umanu no bele halo prevensaun.

Alende ne'e, Komandante Polísia Imigrasaun iha nia diskursu ko'alia kona-ba papél imigrasaun nian liga ho prevensaun ba krime tráfiku umanu tuir Lei Orgánika Imigrasaun nian. Lei orgánika ne'e atribui mós knaar ida ba iha imigrasaun hodi halo sosializasaun ba iha eskola sira, iha suku sira no área sira ne'ebé susar atu asesu informasaun liuliu informasaun sira kona-ba oinsa comunidade bele ajuda identifika no relata kazu sira ho tipu tráfiku umanu ba instituisaun relevante inklui polísia imigrasaun.

Komandante Imigrasaun informa mós katak durante ne'e krime tráfiku umanu akontese duni, maibé ita-nia comunidade sira mak menus informasaun no koñesimentu hodi identifika no relata kazu sira ba autoridade suku no autoridade polisial no rekoñese katak krime tráfiku umanu iha potencialidade boot akontese iha área fronteira, tanba ne'e husu ba comunidade, joventude no estudante sira bele ajuda kolabora ho polísia imigrasaun atu nune'e bele halo prosesu investigasaun no

parte imigrasaun sempre pruntu atu apoiu ba situasaun sira ne'ebé comunidade sira hasoru liga ho oinsa atu bele lori kazu tráfico umanu ba prosesu tur lei ne'ebé eziste.

Konvidadu no partisipante sira iha atividade kampaña ne'e mak representante Ministériu Interiór (Diresaun Imigrasaun no Investigasaun), Representante Administradór Postu Balibo, Polísia Nasionál Timor-Leste (PNTL) Eskuadra Batugade, Komandante Migrasaun Batugade, Unidade Polisia Fronteira (UPF), Representante Alfândega, representante *Banco Nasionál de Comercial de Timor Leste (BNCTL)*, estrutura suku, comunidade sira, joventude, comunidade LGBTIQ+ ema ho defisiénsia (EhD) no alunu sira.

Atividade kampaña ne'e remata ho entrega sertifikadu ba mobilizadór comunidade sira ne'ebé durante loron 4 partisipa ona iha treinamentu kona-ba oinsa tráfico umanu no oinsa bele identifika no halo prevensaun, nune'e mós entrega presente ba labarik sira ne'ebé hatudu atrasaun dansa hodi anima atividade kampaña ne'e. Sertifikadu entrega hosi Diretora Ezekutiva JSMP no Sra. Alexandra hosi UN-Women. Enkuantu presente ba labarik sira entrega hosi Jestór Programa JSMP, Sr. Casimiro Dos Santos no konvidadu sira.

Atu hetan informasaun liután favór kontaktu

Sra. Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <http://jsmp.tl>